



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikado Imprensa

Periodu: Maiu 2010

Pubikasaun: 24 Maiu 2010

Deputadu husi Aliansa Maioria Parlamentu halo krítika hasoru Governu

Iha loron 18 Maiu 2010, deputadun Partidu Demokrátiku (PD) Sr. Lucas da Costa halo krítika governu Aliansa Maioria Parlamentu (AMP) liu husi ninia deklarasaun polítika iha plenária. Deklarasaun ne'e konabá akordu ne'ebé mak Ministru Ekonómia no Dezenvolvimentu Sr. João Gonçalves halo ho kompañia ENSUL atu fo rai komunidadade, ne'ebé mak hanaran 'instalasaun antiga sosiadade agrikula patria traballu', ba ENSUL atu uza iha tinan 99 (sia nolu resin sia) nia laran hodi selu valór ho taxa \$ 6.790 deit, ho rai nia luan 22.635 metru kuadrados.

Deputadu Lucas da Costa deklara katak ENSUL sei aluga propriedade husi estadu Timor Lésté ho arendamentu nia valor total \$ 6.790 ou rai metru ida nia folin \$ 0,30 Sêntimus hanesan ho folin supermi falun rua nian.

Direitór JSMP, Luis de Oliveira Sampaio, haktuir katak saida mak deputadu hosi Bloku AMP halo hodi lansa krítika ba polítika ne'ebé governu AMP halo, hatudu dinamika no ambiente foun iha Parleментu Nasional. Tanbá tuir Sampaio katak deputadu sira hosi bloku AMP persiza halo duni krítika ba governu kuandu persiza. Ne'e hatudu sintidu maturidade polítiku nu'udar ema polítiku nain ne'ebé laos defende deit interese governu ne'ebé kaer ukun, maibe importante liu atu kurize polítika sira ne'ebé la refleta no reprezenta interese publiku.

Tuir deputadu Da Costa, hahalok ne'e hanesan konspirasaun husi membru governu balun hasoru governu no povu Timor Lésté hodi dezonra Estadu Timor Lésté tanbá hakiak korupsaun ba nia aan rasik hodi habokur kompania estranjeirus. Tuir ninia hanoin, akordu ne'e mos hatún povu nia dignidade tanbá tuir nia, ema Timor oan barak iha kapasidade atu aluga rai refere ho arendamentu valor \$ 6.790. Pior liu tan ENSUL sei aproveita fatin ne'e atu halo uma iha laran hodi fo aluga tutan ba ema seluk no sei uza ninian jerador eletrisidade rasik iha area refere no mos fa'an ba públiku ne'ebé hadulas área refere. Ne'e signifika katak ENSUL sei la uza enerjia elétriku estadu ninian. Tanbá ne'e deputadu Lucas da Costa husu ba Ministru Ekonomia no dezenvolvimentu atu mai halo apresentasaun no esplikasaun kona ba akordu ne'e iha Parleментu Nasional no husu ba Komisaun Anti Korupsaun (KAK) atu halo invetigasaun ba kazu ne'e.

Deklarasaun polítika ne'e hamosu pro-kontra iha membrus Parlamentu nia le'et. Deputadu Opozisaun fo apoiu ba deklarasaun polítika ne'e maibe Deputadu Riak Leman husi Partidu Sosial Demokrata (PSD) la konkorda ho deklarasaun polítika ne'e tanbá tuir nia, sé iha problema iha AMP nia laran, diak liu tuur hamutuk atu resolve problema ne'e la'os mai halo fali deklarasaun hodi krítika governu ne'ebé mak partidu maoria forma inklui PD partidu Deputadu Da Costa nian. Hatán ba kestaun ne'e deputadu Da Costa hateten katak, nia sei krítika sé deit mesmu AMP rasik, sé halo buat ruma la loos, tanbá rai ne'e la'os AMP nian maibe povu Timor Léste nian.

JSMP sente hasolok tebes ho dinámika no kultura krítika ne'ebé buras dadaun iha Parlamentu Nasional. Maibe JSMP mos hein katak membru sira Parlamentu Nasional hamutuk hodi halo fiskalizasaun ba program Governu nian atu lao tuir prátika no prinsípiu governasaun diak nu'udar baze ba governasaun adminitrasaun Estadu nian. JSMP fiar katak ho mekanismu no aprosimasaun sira hanesan ne'e mak bele resolve problema nasional no foti desizaun ne'ebé mak loos no justu hodi fo benefisiu ba povu Timor Léste.

Atu hetan informasaun kle'an favor kontaktu:

Luis de Oliveira Sampaio

Diretor Ezekutivu JSMP

Diresaun e-mail: luis@jsmp.minihub.org

Landline: 3323883